

PASIMULA

Antipona sa Pagpasok (Slm 81:16)
(Basahin kung walang pambungad na awit)

Pinakamabuting trigo ipina-kaing totoo ng Diyos sa mga tao, sarap na kanilang gusto tamis ng pulot sa bato.

Pagbati

(Gawin dito ang tanda ng krus)

P—Sumainyo ang Panginoon.

B—At sumaiyo rin.

Paunang Salita

(Maaaring basahin ito o isang katulad na pahayag)

P—Ipinagdiriwang natin ngayon ang Dakilang Kapistahan ng Kabanal-banalang Katawan at Dugo ng Panginoon o “*Corpus Christi*.” Tunay na nananahan si Kristo sa Eukaristiya—ang Sakramento ng bago at walang-hanggang Tipan, at buháy na tanda ng pagliligtas niya sa atin. Hindi man natin lubos maunawaan ang dakilang hiwagang ito, patuloy tayong sumasampalataya sapagkat ang Panginoon mismo ang nagsabi: ang tinapay na ito “ang aking katawan na ihahandog para sa inyo” at ang kalis na ito ay “kalis ng aking dugo na ibubuhos para sa inyo at para sa lahat.” Tunay na mapapalad tayong mga tumatanggap sa kanya.

Pagsisisi

P—Mga kapatid, aminin natin ang ating mga kasalanan upang tayo’y maging marapat gumanap sa banal na pagdiriwang. (Tumahimik)

B—Inaamin ko sa makapangyarihang Diyos at sa inyo, mga kapatid, na lubha akong nagkasala (dadagok sa dibdib) sa isip, sa salita, sa gawa at sa aking pagkukulang. Kaya isinasamo ko sa Mahal na Birheng Maria, sa lahat ng mga anghel at mga banal at sa inyo, mga kapatid, na ako’y ipanalangin sa Panginoong ating Diyos.

P—Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.
B—Amen.

P—Panginoon, kaawaan mo kami.

B—Panginoon, kaawaan mo kami.

P—Kristo, kaawaan mo kami.

B—Kristo, kaawaan mo kami.

P—Panginoon, kaawaan mo kami.

B—Panginoon, kaawaan mo kami.

Gloria

Papuri sa Diyos sa kaitaasan at sa lupa’y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamat ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat. Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen.

Pambungad na Panalangin

P—Manalangin tayo. (Tumahimik)

Diyos na totoo at tao namang totoo, Panginoon naming Hesukristo, ang Huling Hapunan ay inilagak mo para kami’y magkasalu-salo sa ala-ala ng iyong pagpapakasakit ukol sa mga tao. Ipagkaloob mo ang aming kahilingang ang iyong Katawan at Dugo ay aming idangal sa pagdiriwang upang ang dulot mong kaligtasan ay lubos naming mapakinabangan kasama ng Espiritu Santo magpasawalang hanggan.

B—Amen.

PAGPAPAHAYAG NG SALITA NG DIYOS



Unang Pagbasa (Gen 14:18–20)
(Umupo)

Si Melquisedec, hari ng Salem at pari, ay naghain ng tinapay at alak habang pinagbapala niya si Abram. Siya ang propetikong larawan ng Panginoong Jesus, ang kataas-taasan at walang hanggang pari na nagkakaloob ng kanyang sarili bilang tinapay at alak sa Eukaristiya.

Pagbasa mula sa aklat ng Genesis

NOONG mga araw na iyon, dinalhan ni Melquisedec, hari ng Salem at saserdote ng Kataas-taasang Diyos, si Abram ng tinapay at alak, at pinagpala ng ganito: “Pagpalain ka nawa, Abram, ng Diyos na Kataas-taasan na lumikha ng langit at lupa. Purihin ang Kataas-taasang Diyos na nagbigay sa iyo ng tagumpay!” At ibinigay ni Abram kay Melquisedec ang ikapu ng lahat ng kanyang nasamsam.

—Ang Salita ng Diyos.

B—Salamat sa Diyos.

Salmong Tugunan (Slm 109)

T—Ika’y paring walang hanggan katulad ni Melquisedec.

E. C. Marfori



1. Sinabi ng Poon,/ sa Hari ko’t Panginoon, “Maupo ka sa kanan ko,/ hanggang ang kaaway mo/ ay lubos na mapasuko, pagkat iyong matatalo.” (T)

2. Magmula sa dakong Sion,/ ay palalawakin niya ang lupaing iyong sakop;/ “At lahat ng kaaway mo’y/ sakupin at pagharian,” gayon ang kanyang utos. (T)

3. Sasamahan ka ng madla,/ kung dumating ang panahong lusubin ka ng kaaway;/ magmula sa mga bundok,/ lalabas at sasamahan ka ng mga kabataan. (T)

4. Panginoon’y may pangako/ na ito’y tiyak mangyayari, ganito ang kanyang saysay:/ “Katulad ni Melquisedec,/ gagawin kang saserdote, na hindi na wawakasan.” (T)

Ilalawang Pagbasa (1 Cor 11:23–26)

Ang Eukaristiya ay batayang turo at pananampalataya ng Simbahan na tinanggap ni San Pablo at ibinigay naman niya sa mga taga-Corinto.

Ang pagdiriwang ng sakramentong ito ay pagpapahayag ng kamatayan ng Panginoon hanggang sa kanyang pagbabalik.

Pagbasa mula sa unang sulat ni Apostol San Pablo sa mga taga-Corinto

MGA KAPATID: Ito ang aral na tinanggap ko sa Panginoon at ibinibigay ko naman sa inyo: ang Panginoong Hesus, noong gabing siya'y ipagkanulo ay dumampot ng tinapay, nagpasalamat, at pinaghati-hati ito, at sinabi, "Ito ang aking katawan na inihahandog para sa inyo. Gawin ninyo ito sa pag-alala sa akin." Gayundin naman, matapos maghapunan ay hinawakan niya ang kalis at sinabi, "Ang kalis na ito ang bagong tipan na pinagtiti-bay ng aking dugo. Tuwing iinum ninyo ito, gawin ninyo sa pag-alala sa akin." Sapagkat tuwing kakain kayo ng tinapay na ito at inom sa kalis na ito ay ipinahahayag ninyo ang kamatayan ng Panginoon, hanggang sa muling pagparito niya.

—Ang Salita ng Diyos.

B—Salamat sa Diyos.

Awit tungkol sa Mabuting Balita

B—Pagkaing mula sa langit/ ngayo'y hain sa daigdig./ Handog na kaibig-ibig/ kailanma'y di masasaid./ Paghahai'y inilahad/ nang ialay si Isaac,/ ang korderong nagliligtas,/ ang manna ng nagsilikas./ Pastol naming mapagmahal,/ kami'y iyong kaawaan,/ gawing dapat makinabang/ sa pagkaing iyong alay/ hanggang langit ay makamtan./ Magagawa mo ang lahat/ upang tanan ay maligtas,/ akayin mo sa 'yong hapag/ lahat kaming 'yong alagad/ sa buhay mong walang wakas.

Aleluya (Jn 6:51) (*Tumayo*)

B—Aleluya! Aleluya! Pagkaing dulot ay buhay si Hesus na Poong mahal, buhay natin s'ya kailanman. Aleluya! Aleluya!

Mabuting Balita (Lc 9:11b–17)

P—Ang Mabuting Balita ng Panginoon ayon kay San Lucas

B—Papuri sa iyo, Panginoon.

NOONG panahong iyon, nagsalita si Hesus sa mga tao tungkol sa paghahari ng Diyos; pinagaling niya ang mga may karamdaman.

Nang dumidilim na'y nilapitan siya ng Labindalawa at sinabi sa kanya, "Paalisin na po ninyo ang mga tao nang makaparoon sila sa mga nayon sa kabukiran sa paligid upang humanap ng makakain at matutuluyan. Nasa isang ilang na lugar po tayo." Ngunit sinabi niya, "Kayo ang magbibigay sa kanila ng makakain." Sumagot sila, "Wala po tayo kundi limang tinapay at dalawang isda, kaya kailangang bumili kami ng pagkain para sa mga taong ito." May limanlibong lalaki ang naroon. Ngunit sinabi niya sa kanyang mga alagad, "Paupuin ninyo sila nang pulupulotong na tiglimampu." Gayun nga ang ginawa nila—pinaupo ang lahat. Kinuha ni Hesus ang limang tinapay at dalawang isda, tumingala sa langit, at nagpasalamat sa Diyos. Pinaghati-hati niya ang mga ito, at ibinigay sa kanyang mga alagad upang ipamahagi sa mga tao. Nakakain ang lahat at nabusog. Tinipon ng mga alagad ang lumabis; at nakapuno sila ng labindalawang bakol.

— Ang Mabuting Balita ng Panginoon.

B—Pinupuri ka namin, Panginoong Hesukristo.

Homiliya (*Umupo*)

Pagpapahayag ng Pananampalataya (*Tumayo*)

B—Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkatawang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nanga-bubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen.

Panalangin ng Bayan

P—Sa pamamagitan ng katawan at dugo ng iyong Anak, O Ama, muli mong itinatag ang iyong ugnayan sa amin at iniligtas mo kami sa kasalanan kasama ng at sa pagpapala ng Espiritu. Kandilihin mo ang aming katawan at kaluluwa, kami'y nagsusumamo:

T—Diyos ng buhay, panatilihin mo kami.

L—Mapagmahal na Ama, patatagin mo ang loob ni Papa Francisco, mga obispo, mga pari, mga diyakono, at kaming mga layko, upang sa pamamagitan ng iyong Espiritu, kami nawa'y maging tinapay na nagbibigay buhay sa mundong gutom sa iyong Salita. Manalangin tayo: **(T)**

L—Mapagmahal na Ama, liwanagan mo ang isip ng aming mga pinuno sa pamahalaan upang sila'y makapaglingkod nang may malasakit at kakayahan tungo sa iyong higit na kaluwalhatian. Manalangin tayo: **(T)**

L—Mapagmahal na Ama, panatilihin mo lahat ng mga nagugutom, sa pisikal at espiritwal na aspekto, sa pamamagitan ng Eukaristiyang pinagdiriwang namin ngayon. Manalangin tayo: **(T)**

L—Mapagmahal na Ama, pahintulutan mong makasalo ang aming mga mahal na yumao sa iyong makalangit na piging. Manalangin tayo: **(T)**

L—Sa ilang sandali ng katahimikan itaas natin sa Diyos ang ating personal na kahilingan gayundin ang mga taong lubos na nangangailangan ng ating panalangin (*Tumahimik*). Manalangin tayo: **(T)**

P—Ama, mapunan nawa ng katawan at dugo ng iyong Anak ang bawat pangangailangan

ng aming katawan at kaluluwa upang kami ri'y maging pagkaing nagbibigay-buhay sa bawat isa, sa pamamagitan ni Kristo kasama ng Espiritu Santo, magpasawalang hanggan.

B—Amen.

PAGDIRIWANG NG HULING HAPUNAN



Paghahain ng Alay (*Tumayo*)

P—Manalangin kayo...

B—Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P—Ama naming Lumikha, bigyan mo ngayon ang iyong sambayanan ng mga kaloob na pagkakaisa at kapayapaan na ipinahihiwatig ng mga alay namin sa paghahaing ipinagdiriwang sa pamamagitan ni Hesukristo kasama ng Espiritu Santo magpasawalang hanggan.

B—Amen.

Prepasyo (*Huling Hapunan I*)

P—Sumainyo ang Panginoon.

B—At sumaiyo rin.

P—Itaas sa Diyos ang inyong puso at diwa.

B—Itinaas na namin sa Panginoon.

P—Pasalamat natin ang Panginoong ating Diyos.

B—Marapat na siya ay pasalamat.

P—Ama naming makapangyarihan, tunay ngang marapat na ikaw ay aming pasalamat sa pamamagitan ni Hesukristo na aming Panginoon.

Siya ang talagang dakila at lagi mong ikinalulugod na paring naghahain para sa sansinukob nitong pag-aalay na tangi mong ibinukod. Ang ipinagdiriwang sa Huling Hapuna'y paghahain niya para sa tanan upang alalahanin nami't pagsaluhan. Ang laman niya'y inihain upang lahat ay buhayin. Ang dugo niya'y dumanak nang lahat ay mapatawad.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B—Santo, Santo, Santo Panginoong Diyos ng mga hukbo! Napupuno ang langit at lupa ng kaluwalhatian mo! Osana sa kaitaasan! Pinagpala ang naparirito sa ngalan ng Panginoon! Osana sa kaitaasan! (*Lumuhod*)

Pagbubunyi (*Tumayo*)

B—Aming ipinahahayag na namatay ang 'yong Anak, nabuhay bilang Mesiyas at magbabalik sa wakas para mahayag sa lahat.

PAKIKINABANG

Ama Namin

B—Ama namin...

P—Hinihiling naming...

B—Sapagkat iyo ang kaharian at ang kapangyarihan at ang kapurihan magpakailanman! Amen.

Pagbati ng Kapayapaan

Paanyaya sa Pakikinabang (*Lumuhod*)

P—Ito ang Kordero ng Diyos. Ito ang nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B—Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona sa Komunyon (*Jn 6:57*)

"Ang nagsasalo sa buhay ng sariling aking alay sa akin ay mananahan, ako ay makakapisan," ani Hesukristong mahal.

Panalangin Pagkapakinabang (*Tumayo*)

P—Manalangin tayo. (*Tumahimik*)

Panginoong Hesukristo, hinihiling naming kami'y gawin mong makasalo nang lubusan sa bunga ng banal na pakikinabang sa iyong buhay na idinudulot sa piging ng paghahain ng iyong Katawa't Dugong banal kasama ng Espiritu Santo magpasawalang hanggan.

B—Amen.

PAGTATAPOS

P—Sumainyo ang Panginoon.

B—At sumaiyo rin.

Pagbabasbas

P—Magsiyuko kayo habang iginagawad ang pagbabasbas. (*Tumahimik*)

Gawaran nawa kayo ng pagpapala ng maawaing Diyos upang lagi ninyong mapahalagaan ang kanyang karununganang nagdudulot ng kaligtasang walang hanggan.

B—Amen.

P—Gawaran nawa ng katatagan ng Diyos ang inyong pananampalataya na nasasalig sa kanyang pagmamahal upang mamalagi kayong nagsisikap gumawa ng kabutihan ngayon at magpasa walang hanggan.

B—Amen.

P—Patnubayan nawa ng Diyos ang inyong paglakad sa daang hahantong sa kanya upang inyong taluntunin ang landas ng pag-ibig at kapayapaang walang hanggan.

B—Amen.

P—At ang pagpapala ng makapangyarihang Diyos, Ama at Anak (†) at Espiritu Santo ay manaog nawa at mamalagi sa inyo magpasawalang hanggan.

B—Amen.

Pangwakas

P—Tapos na ang Misa. Humayo kayo sa kapayapaan ni Kristo.

B—Salamat sa Diyos.

BE A PRIEST OR A BROTHER OF MASS MEDIA

If you are a Grade 12 student, a college student, or a young professional, male, single, and interested to become a priest or a brother involved in the apostolate of social communication, we invite you to journey with us.

Visit our websites:

ssp.ph or stpauls.ph

Tel: (02) 8895-9701